



XUNTA
DE GALICIA



CONVENIO DE COLABORACIÓN ENTRE A ENTIDADE PÚBLICA EMPRESARIAL AUGAS DE GALICIA, O ENTE PÚBLICO PORTOS DE GALICIA E O CONCELLO DE PONTEDEUME EN RELACIÓN COAS ACTUACIÓNS NO DOMINIO PÚBLICO PORTUARIO PARA A EXECUCIÓN E MANTEMENTO DA OBRA "MELLORAS NO SANEAMENTO EN CABANAS E PONTEDEUME. FASE I. CONCELLO PONTEDEUME (A CORUÑA)"

Santiago de Compostela, 13 de decembro de 2017

REUNIDOS

Dunha parte, Beatriz Mato Otero, conselleira de Medio Ambiente e Ordenación do Territorio, en nome e representación da entidade pública empresarial Augas de Galicia, con domicilio a efectos deste convenio en Praza Camilo Díaz Baliño 7-9 ; 15781- Santiago de Compostela (A Coruña), no exercicio das funcións atribuídas polos artigos 13 da Lei 9/2010, do 4 de novembro e 6 do Estatuto da entidade pública empresarial Augas de Galicia, aprobado polo Decreto 32/2012, do 12 de xaneiro.

Doutra parte, José Juan Durán Hermida, Presidente do ente público Portos de Galicia, con domicilio a efectos deste convenio en Plaza de Europa, nº 5A - 6º Planta; 15071 Santiago de Compostela (A Coruña), actuando en nome e representación deste en virtude das facultades que a tal efecto lle confiren os artigos 6.3 g) da Lei 5/1994, de 29 de novembro, de creación do ente público Portos de Galicia e o artigo 9h) do Decreto 227/1995, do 20 de xullo polo que se aproba o Regulamento do Ente.

E doutra parte, Bernardo Fernández Piñeiro, alcalde do concello de Pontedeume, con domicilio a efectos deste convenio en Rúa Real, 13, 15600 Pontedeume (A Coruña), no exercicio das atribucións conferidas no artigo 21.1.b) da Lei 7/1985, de 2 de abril, reguladora das bases do Réxime Local.

Todas as partes recoñécense mutuamente na calidade en que interveñen coa capacidade legal necesaria para o outorgamento deste convenio e para o efecto

EXPOÑEN

O 30.08.2016 asinouse un convenio de colaboración entre a entidade pública empresarial Augas de Galicia e o Concello de Pontedeume para a execución de actuacións de "Melloras no saneamento en Cabanas e Pontedeume. Fase I. Concello Pontedeume (A Coruña)", cofinanciada pola Unión Europea a través do Fondo Europeo de Desenvolvemento Rexional (FEDER) nun 80%, no marco do Programa Operativo FEDER Galicia 2014-2020, por un importe de catro millóns trescentos mil euros (4.300.000,00€)

Coa a citada actuación preténdese reformar a rede principal de saneamento de Pontedeume, conseguindo con elo evitar as infiltracións de auga mariña na rede



**XUNTA
DE GALICIA**



principal, eliminar os alivios da rede á ría de Pontedeume, dimensionar os novos colectores adecuándoos as necesidades actuais e regular os caudais enviados á EDAR en tempo de choiva. Con estas actuacións, mellorárase o tratamento e xestión das augas residuais ao municipio e minimizarase os vertidos á ría de Pontedeume.

Para a execución das obras de referencia cómpre ocupar terreos pertencentes ao Dominio Público Marítimo-Terrestre e Zona de Servidume, e están incluídas na zona de adscrición do Porto de Pontedeume, competencia de Portos de Galicia de conformidade co estipulado na Lei 5/1994, de creación do ente Portos de Galicia.

O 23 de abril de 2015 Portos de Galicia informou favorablemente o proxecto das instalacións referidas, previamente a súa aprobación.

A execución de infraestruturas de saneamento coma as que se pretende acometer resulta beneficiosa non so para a vila, senón tamén para a explotación futura das instalacións portuarias.

Por iso, dado o interese coincidente de todas as partes na execución desta obra, acordan regular as súas relacións en relación coa posta a disposición de terreos, execución, titularidade, mantemento, limpeza e mellora da parte da obra que discorre polo Porto de Pontedeume, que figura no anexo I, e formalizan este convenio, de acordo coas seguintes

CLÁUSULAS

PRIMEIRA.- OBXECTO

O obxecto deste convenio establecer as condicións básicas para a colaboración entre a entidade pública empresarial Augas de Galicia, o ente público Portos de Galicia e o concello de Pontedeume, para determinar as condicións nas que o ente público Portos de Galicia autoriza a execución das obras que se definen no proxecto "Melloras no saneamento en Cabanas e Pontedeume. Fase I. Concello Pontedeume (A Coruña)", de clave OH.315.1047, na parte que se desenvolve no dominio público portuario (no Porto de Pontedeume) e pon a disposición libres de cargas os terreos que resulten necesarios para a execución das anteditas obras na zona do Porto de Pontedeume.

Concretamente o dominio público portuario no que se desenvolverán as citadas actuacións reflíctese no plano anexo a este convenio.

SEGUNDA.- OBRIGAS DAS PARTES


A.- OBRIGAS DA ENTIDADE PÚBLICA EMPRESARIAL AUGAS DE GALICIA

Para o cumprimento do obxecto deste convenio, Augas de Galicia obrígase a:

1 Respetar as actuacións establecidas no proxecto que se xunta como anexo ao convenio na execución das obras no Porto de Pontedeume definidas no proxecto "Melloras no saneamento en Cabanas e Pontedeume. Fase I. Concello Pontedeume (A Coruña)".

Calquera modificación do proxecto, así como a execución de obras non contempladas no mesmo requirirá a previa autorización de Portos de Galicia.

2 No ámbito das súas facultades, afrontar e intentar resolver conforme aos principios de boa fe e lealdade, as dificultades ou problemas que podan xurdir no desenvolvemento deste convenio.



A formalización deste convenio non implica no seu desenvolvemento e execución compromisos adicionais de gasto respecto dos comprometidos e asumidos no convenio subscrito entre a entidade pública empresarial Augas de Galicia e o Concello de Pontedeume o 30.08.2016.

B.- OBRIGAS DO CONCELLO DE PONTEDEUME

Para o cumprimento do obxecto deste convenio, o Concello de Pontedeume obrígase a:




1 Respecto ás relacións co ente público Portos de Galicia, unha vez que as obras estean rematadas, e dado que o concello asumirá a súa titularidade de conformidade co estipulado no *convenio de colaboración subscrito o 30.08.2016 entre a entidade pública empresarial Augas de Galicia e o Concello de Pontedeume para a execución de actuacións de "Melloras no saneamento en Cabanas e Pontedeume. Fase I. Concello Pontedeume (A Coruña)", cofinanciada pola Unión Europea a través do Fondo Europeo de Desenvolvemento Rexional (FEDER) nun 80%, no marco do Programa Operativo FEDER Galicia 2014-2020:*

- a) asumir a conservación, mantemento e limpeza da obra realizada nos terreos de dominio público portuario, correspondéndolle o mantemento da rede de saneamento executada;
- b) asumir as responsabilidades que fronte a terceiros puidesen xurdir derivadas da posesión, disposición e utilización da infraestrutura de saneamento autorizada, quedando Portos de Galicia eximido de toda responsabilidade neste extremo.

2 O concello entregará, libre de cargas e gravames, a titularidade das obras de referencia executadas en dominio público portuario ao ente público Portos de Galicia.

En virtude deste convenio, as obras que se ceden a Portos de Galicia, unha vez que esta entidade acepte tal cesión, quedarán integradas de pleno dereito no patrimonio propio de Portos de Galicia, ao abeiro dos artigos 9º.t) e 31º.1 do Regulamento de Portos de Galicia, ditado en aplicación e desenvolvemento da Lei 5/1994, do 29 de novembro.



C.- OBRIGAS DO ENTE PÚBLICO PORTOS DE GALICIA

Para o cumprimento do obxecto deste convenio, o ente público Portos de Galicia obrígase a:

1 Autorizar a execución das obras do proxecto de referencia, podendo supervisar en calquera momento a súa execución. No caso de detectar desviacións ou deficiencias na execución da obra, poñerá esta circunstancia en coñecemento da dirección da obra e, de existir dano, convocará inmediatamente á Comisión de Seguimento.

2 Poñer a disposición libres de cargas os terreos que resulten necesarios para a execución das obras na zona do Porto de Pontedeume para o normal desenvolvemento das obras.

3 Autorizar a intervención de Augas de Galicia e do concello de Pontedeume na zona do Porto de Pontedeume para o cumprimento das obrigas derivadas deste convenio.

4.- As anteriores autorizacións, nin os pactos e as obrigas estipuladas neste convenio, supoñen alteración da titularidade ou cualificación xurídica dos bens e dereitos portuarios afectados.

Calquera modificación do proxecto das obras que afecte á zona do Porto de Pontedeume, deberá contar coa autorización expresa de Portos de Galicia.

TERCEIRA. COMISIÓN DE SEGUIMENTO

Constituirase, a iniciativa de calquera das partes, unha comisión formada por dous representantes de cada unha das partes para desenvolver as seguintes actuacións:

- Impulsar e avaliar o cumprimento deste convenio, proponendo as actuacións que se consideren precisas.
- Interpretar, en caso de dúbida, o contido do convenio.
- Proponer ás partes a resolución das posibles controversias que puideran xurdir na aplicación do convenio.

Esta comisión reunirse as veces que se estimen oportunas para o cumprimento do convenio.

Os membros desta comisión de seguimento poderán asistir ás reunións desta acompañados do persoal técnico que consideren oportuno. Ademais, cando se considere oportuno, a Comisión de Seguimento poderá requirir a asistencia técnica necesaria para a avaliación e análise das distintas cuestións sobre as que deban adoptarse acordos.



XUNTA
DE GALICIA



CUARTA. NATUREZA E RÉXIME XURÍDICO

Este convenio de colaboración ten natureza administrativa, rexendo na súa interpretación e desenvolvemento o ordenamento xurídico-administrativo, e supletoriamente, polos principios do Real decreto lexislativo 3/2011, do 14 de novembro, polo que se aproba o texto refundido da Lei de contratos do sector público, consonte o establecido no artigo 4.2 da antedita lei e a Lei 40/2015 do 1 de outubro de Réxime Xurídico do Sector Público.

Todo litixio, controversia ou reclamación resultantes deste convenio ou relativo a este, a súa interpretación ou execución, o seu incumprimento, resolución ou nulidade, resolverase pola xurisdición contencioso-administrativa.

QUINTA. MODIFICACION DO CONVENIO.

As modificacións formalizaranse mediante addenda a este convenio cos mesmos requisitos e condicións que para a aprobación do convenio.

SEXTA. -CAUSAS DE RESOLUCIÓN.

As dúbidas que se presenten na súa interpretación, en caso de discrepancias, serán resoltas, visto o informe da Comisión de Seguimento, pola Presidencia de Portos de Galicia, poñendo fin á vía administrativa.

Serán causas de extinción do convenio:

- O non cumprimento do seu obxecto.
- A inviabilidade da realización das actuacións descritas neste convenio por causas non imputables ás partes.
- A denuncia por causas de interese público a instancia de calquera das partes.
- O transcurso do prazo de vixencia do convenio sen acordarse a prórroga do mesmo.
- O acordo unánime de todos os asinantes.
- O incumprimento das obrigacións e compromisos asumidos por parte dalgún dos asinantes.

A este efecto o incumprimento poderá ser de carácter total ou parcial de calquera das cláusulas do convenio. Entenderase por incumprimento parcial aquel que implica en maior ou menor grado a non consecución dos fins propios do convenio ou impidan de xeito directo ou indirecto as actuacións previstas nel.

Neste caso, calquera das partes poderá notificar á parte incumpridora un requirimento para que cumpra nun determinado prazo coas obrigacións ou compromisos que se consideran incumplidos. Este requirimento será comunicado ao responsable do mecanismo de seguimento, vixilancia e control da execución do convenio e ás demais partes asinantes. Se transcorrido o prazo indicado no requirimento persistise o incumprimento, a parte que o dirixiu notificará ás partes asinantes a concorrencia da causa de resolución e entenderase resolto o convenio. A



XUNTA
DE GALICIA



resolución do convenio por esta causa poderá levar a indemnización dos prexuízos causados, estes prexuízos tasaranse contraditoriamente polas partes.

- Por decisión xudicial declaratoria da nulidade do convenio.
- Por calquera outra causa distinta das anteriores prevista no convenio ou noutras leis.

Cada unha das situacións descritas por sí soa é causa suficiente da resolución do convenio.

No caso de extinción anticipada, por algunha das causas anteriores, e respecto ás actuacións en curso, a liquidación deste convenio axustarase ó que segue:

Remataranse as accións e expedientes administrativos e xa iniciadas que aínda estean sen rematar.

Sen prexuízo do anterior, o convenio, de acordo co art. 51 da Lei 40/2015 extinguirase polo cumprimento das actuacións que constitúen o seu obxecto ou por incorrer en causa de resolución.

SÉTIMA.- INEXISTENCIA DE RELACIÓN CONTRACTUAL

Este convenio non supón asociación algunha ou dependencia entre o persoal dependente das partes asinantes, que actuarán de xeito absolutamente independente e autónomo, sendo obriga específica e exclusiva de cada unha delas cumprir con cantas obrigas legais que como empregadores lle correspondan no desenvolvemento da súa actividade ao abeiro deste convenio. Deste xeito, a subscripción do presente convenio non comportará relación laboral, contractual ou de calquera outro tipo entre as partes asinantes deste convenio e os profesionais e empresas que por conta das partes asinantes desenvolvan as actividades obxecto deste convenio; de tal xeito que non se lle poderá esixir responsabilidade algunha directa, indirecta ou subsidiariamente polos actos ou feitos acaecidos no desenvolvemento do mesmo.

OITAVA. RESPONSABILIDADE FRONTE A TERCEIROS

1.- Habida conta dos riscos que se podan derivar na utilización das instalacións para o fin a que están destinadas, será responsabilidade do Concello de Pontedeume responder dos danos que se deriven a terceiros polo cumprimento defectuoso das obrigas que asumen por medio de este convenio.

2.- A responsabilidade aquí establecida se establece nos termos do artigo 33 da Lei 40/2015, do 2 de outubro, de Réximen xurídico do Sector Público, e a competencia para instruír o expediente de reclamación patrimonial, correspónderalle a Portos de Galicia.



XUNTA
DE GALICIA



NOVENA.- PUBLICIDADE

A sinatura deste convenio suporá o consentimento expreso das partes asinantes para incluír e facer públicos os datos persoais que consten no convenio, e mailo resto de especificacións contidas no mesmo, de conformidade co artigo 15 da Lei 1/2016, do 18 de xaneiro, de transparencia e bo goberno (DOG nº 30 do 15 de febreiro) e o Decreto 126/2006, do 20 de xullo, polo que se regula o rexistro de convenios da Xunta de Galicia (DOG nº 149 do 3 de agosto).

DÉCIMA. VIXENCIA DO CONVENIO

Este convenio entrará en vigor ao día seguinte ao da súa sinatura, estendendo a súa vixencia durante o tempo de execución das obras e o seu prazo de garantía; en todo caso a data límite da súa vixencia será o 31.12.2019.

E para que así conste, en proba de conformidade coas cláusulas deste convenio, asinan as partes o presente documento por triplicado exemplar, no lugar e data do encabezado

O presidente de Portos de Galicia



José Juan Durán Hermida


A presidenta de Augas de Galicia



Beatriz Mato Otero

O alcalde de Pontedeume

Bernardo Fernández Piñeiro



ANEXO I. Plano no que se reflicte o dominio público portuario no que se desenvolverán as actuacións de clave OH.315.1047

